

Date – 21/09/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. PWD Minister Pu Vanlalhlana Mizoram ei leh bar chawkluhna ber NH-6 kawngpui chhia chuan mipui nunphung a tikhaihlaka Mizoram sorkar pawhin mawhphurhna la in, ngawrh taka siam mek a ni a ti.
2. Supply Minister Pu B.Lalchhanzovan, khaw awmdan a zirin zanin hian bungraw phur motor kawngchhiat avanga tangkhang te a tahtawla chhuah theih an beisei tih a sawi.
3. Zanina Quad Leaders' Summit hmang turin Prime Minister Narendra Modia chuan vawiin khan US a thleng
4. Union Ministry of Environment, Forest and Climate Change chuan nungchate chenna ti changlung tura ni 100 chhunga an hmachhawp an tihlawhtling thei.

<><><>

PWD MINISTER

PWD Minister Pu Vanlalhlana chuan Mizoram ei leh bar chawkluhna ber NH-6 kawngpui chhia chuan mipui nunphung a tikhaihlaka Mizoram sorkar pawhin mawhphurhna la in, ngawrh taka siam mek a ni a ti.

PWD Minister Pu Vanlalhlana leh Supply Minister Pu B.Lalchhanzova ten vawiin khan NH-6 Kawnpui leh Khamrang khaw inkar kawng chhe siam mek chu a hmunah kalin hnthawh dan leh kawng dinhmun an en fiah a, PWD hnathawktu ten ngawrh takin kawng chhe siam hna an thawk a, motor kaltlang theiha a chhelaite siam that a ni.

PWD Minister Pu Vanlalhlana chuan, kumin hian kum dang zawng aiin ruahtui tla a tam a, chu chuan Mizoram hmun hrang hrang kawngpui a tichhe nasa hle a, hmun 573 velah kawngpui hnawha leimin a awm a ni a ti a. Mipuite pawhin sorkar hmalakna ah tha thawhin Central YMA, NGO pawl hrang hrang, Mizoram Truck Owner Association, Mizoram Truck Driver Association, Comercial Vehicle Owner Association, Kolasib DC leh Police te bakah khawtlang hruaitute an tangkai hle a ni a ti.

Pu Vanlalhlana chuan, tuna Sorkarin kawng chhia a thumthat mek hi a chhe zualpui siamthatna chauh a la ni riha, furlai a nih avangin duhthu sama siam theih a la ni rih lo, ei leh bar leh nitin mamawh a lo luh theihna tur a ngaihtuah ber rih a, hun a lo kal anga tha zawk leh mawihnai zawkin Sorkarin kawngpui hi a thum tha zel dawn a ni, a ti.

He hunah hian, kawngchhe siama hnatlang Khamrang YMA te hnenah Minister te hian thingpui lumna tur sum leh pai an hlan a ni.

PWD Minister Pu Vanlalhlana hian nimin khan Aizawl Falkland veng a World Bank kawng lei tla hniam chu a hmunah kalin a enfiah a, siam that dan tur leh bawhzui dan turte department hotute a sawipui nghal a ni. He lai lei tlak hniamna

hmun hi kawngpui inkalpawhna pawimawh tak a ni a, tunah hian lei tla hniam hian kawng chanve aia tam mah a lak hek avangin motor lian leh full load tan chuan zawh ngam a ni lo a, hei hian harsatna a siam nasa hle a ni," a ti.

Minister sawi danin, helai lei tlahniam siamtha tur hian Sorkar chuan kawngpui chhak lam Assam Rifle ram la heka kawng zauh turin ruahmanna a siama, Assam Rifle te ram hi Land Lease siam a la nih loh avangin he kawngpui zauh tura ruahmanna hi kaltlangpui theih kan inbeisei a, a rang thei ang bera he hna thawh thuai hi an tum a ni a ti.

<><><>

OIL PROBLEM

Food Civil Supplies & Consumer Affairs Minister Pu B.Lalchhanzova chuan, khaw awmdan a zirin zanin hian bungraw phur motor kawngchhiat avanga tangkhang te a tahtawla chhuah theih an beisei tih a sawi.

Vawiina NH-6 Kawnpui leh Khamrang khaw inkar kawng chhe siam mek an endiknaah he thu hi sawiin Minister chuan tunah hian Mizoram lam panin tuialhthei phur motor an rawn chho mek a, Silchar lamah pawh motor engemawzatin tuialhthei phurturin an dawh mek a, harsatna dang a awm loh chuan hun reiloteah mipuite mamawh puhruk thuai beisei a ni, a ti.

Hetihlai hian, Mizoram Oil Tanker Drivers' Association (MOTDA) leh Petroleum Entrepreneurs and Transporters Union of Mizoram (PETUM) te chuan duhtusamin kawngpui siam that la ni chiah lo mah se Mizoramin tuialhthei-ah harsatna a tawh nasat tak avangin tuialhthei phurtu lirthei a tlan ngam leh tlan theihthe chu tlan tawh mai ni se, an ti.

Hemi chungchangah hian nimin khan thuchhuah siamin tuialhthei phurtu pawl pahnihte chuan National Highway 306, Kawnpui leh Sairang inkar kawngpui siam that mek chu kawng khuar zualpui laite hnawh that ni tawh mah se tuialhthei phur lirthei tlan nan duh thu a la sam lo hle, an ti a. Kawngpuite siam that mek ni mah se Mizoramin tuialhtheiah harsatna a tawh nasat avang leh mipui mamawh a rang thei ang bera puhruk a nih theih nan tuialhthei phur tlan thei leh tlan ngamte chu tlan tawh mai se, an ti.

Hetih rual hian kawngpui chhia siam meka hmachhawp la awm te chu rang taka thawh chhunzawm a nih theih nan sawrkarin hma a lak chhunzawm zel an beisei thu an tarlang bawk.

Petrol leh Diesel supply khaihlak avang hian Aizawl ah chuan khawlaia lirthei tlan pawh a tlem phah niin kan corr chuan a sawi a, petrol pump ten pekchhuah tur an neih loh avangin, a to a zuartute mi tam takin an dawr a, black a zuar te hian petrol litre ah cheng 150 atanga 200 inkar an chhiar a ni.

<><><>

CHAMPHAI

Tukin khan Champhai khawpui chhunga chawhmeh bazarna hmunpui ber, Champhai Bazarpu, Rahsi Veng, Vengthlanga sa leh thlai thar zuarte bukna leh tehna hrang hrang hmante endik a ni.

He hunah hian Pu CC Sakhawliana DCSO hovin Legal Metrology Department, Sub Hqtrs YMA, MHIP & Champhai Consumer hotu te an thawkchhuak a. Bukna dik lo hmangtute hnen atangin - Non- Standard Spring Balance - 9 leh Beam Scale 1 te man a ni.

Champhai DCSO Pu CC Sakhawliana chuan bukna dik leh diklo hi a khat tawka enfiah a nih fo tur thu leh Consumer ten an chanvo dik tak an chan ngei theih nan hma lak zel tum a nih thu a sawi a. DCSO chuan Consumer ten an chanvo dik tak an chan ngei theih nan lungawi lohna neite chuan District Consumers Dispute Redressal Commission hmang tangkai turin a ngen bawk a ni.

<><><>

SWACHHHATA HI SEVA

Tukin khan Aizawl District chhunga Faina Beihpui Thlakna ‘Swachhata hi Seva 2024’ kal zelah Aizawl MINECO, Tlangzawl – SIPMIU Road Khatla ah DC Pu Lalhriatpuia hovin Faina hnatlang neih a ni.

Mahni nunphung a Faina leh thianghlimna senglut theuh turin kalkhawm ten thu an siam a, Aizawl DC chuan he hnatlangpui hi hawngin ram fai leh thianghlim nei tur chuannunpui a tul thu a sawi a. Naupang zawkte atanga intuh a pawimawh thu leh, chumi tur chuan thiltih a inzirtir a intihhmuh a hlawkthlak thu a sawi. DC chuan mahni hma zawn theuh ah hma la vek turin kalkhawmte a sawm a ni.

He hnatlang hi Directorate of Women & Child Development ruahman in Cleanliness Target Unit/ Black Spot atan hnatlanna hmun hi a thlan a ni a. Directorate of Women & Child Development bul tum in, New Capital Complex Branch YMA, DC Aizawl leh UD&PA te nena thawkho in he faina hnatlang hi neih a ni.

He hnatlang hawna inkhawm hi Pu R. Lalrosiama President New Capital Branch YMA chuan kaihuai in, Pi Zoramthangi Chhangte, Director, Women & Child Development chuan kalkhawmte hnenah thutiam lakna hun leh thu tawi sawina hun a nei a. Mizo te ram neihchhun vawnhim a pawimawhzia leh bawlhhlawh paih thin dan ten ecosystem an tih buai theih dan bakah mitin te midang entawn tura hma hruaitu ni turin kalkhawmte a chah a ni.

Directorate of Women & Child Development thawktu te bakah New Capital Branch YMA member te atangin mi 200 chuang hnatlang ah hian thawkchhuakin, DC Aizawl leh UD&PA te remruatna in bawlhloh paih motor in an hnawmhnawk tihfai te hi paih nghal a ni.

Lungleiah pawh Urban Development & Poverty Alleviation (UD&PA) Department, Lungleia thawktute chuan Lunglei Pukpui dai kawng dung leh kawng thlanga a paihna hmun ni lova bawlhhlawh paihte an thian fai a. Pukpui CTU hi Swachhata Hi Seva 2024 kalpui chhunga Lunglei khawpui huam chhung-a vantlang hmunhma then fai ngai bik ruahman pariat zinga pakhat a ni.

<><><>

ASF

Animal Husbandry & Veterinary Department chhinchhiah danin kumin chhungin vawiin thleng khan vawk pul hri, African Swine Fever (ASF) vangin vawk 12857 an thi tawh.

Vawiin khan ASF vangin vawk 43 thih belhin, ASF avangin vawk suat 118 an awm belh . Kumin chhunga vawk suat tawh zawng zawng hi vawiin thleng khan 22087 a ni. AH&Vety department chhinchhiah danin Mizoram chhungah African Swine Fever (ASF) vang hian veng leh khaw 237 a nghawng tih an tarlang.

Serchhip District Veterinary Office Report tarlan danin, Serchhip District- a Vawk hrilen mekna Veng leh Khua 6 ah vawiin khan Vawk 21 thi leh in, hrilenna veng leh khua 4 ah Vawk 24 suat leh an ni a. Vawiin bikah hri len mekna Chhiahtlangah vawk thi tam berin vwk 11 an thi leh a, vawk suat tamna ber New Serchhip ‘N’ ah vawk 12 suat an ni.

Serchhip District pumpuiah vawiin thleng khan African Swine Fever (ASF) vang hian Vawk 3308 zet thi tawhin Vawk 6659 zet suat an ni tawh a. ASF avang hian Thenzawlah Vawk thi tam ber tawhin Vawk 1056 a thi tawh a, Chhingchhipah Vawk suat tam berin Vawk 1304 suat an ni tawh bawk a ni.

Serchhip District a Vawk hri lenna veng leh khuaah te hian Vawk 4284 la awm anga chhinchhiah niin, District chhung Veng leh khua engemawzat chu ASF hri len mekna ‘Infected Area’ ah puan mek ala ni bawk a ni.

<><><>

PM US TOUR

Zanina Quad Leaders' Summit hmang turin Prime Minister Narendra Modia chuan vawiin khan US a thleng a. Quad member ram hruaitute pawh he hun hmang tur hian an thleng kim tawh a. Quad Annual Summit vawi 4-na Delaware-a Wilmington-ah neih tur a ni a. Quad ram hruaitute hian thu pawimawh tak tak sik leh sa inthlak chungchangte, technology chhuak thar chungchangte leh thildang an sawi ho ang. Hei bakah hian Prime Minister Modia hian Summit karlakah hian US President Joe Biden leh ram hruaitu dangte a kawm dawn bawk a ni.

A zinchnuah hmaa thuchhuah a siamah PM Modia chuan President Biden, Prime Minister Albanese leh Prime Minister Kishida te nen Quad Summit-a an inhmukhawm tur chu phurawm a tih thu a sawi a. An pawl indin chu ngaihdan thuhmun neia kalkhawm an nih avangin Indo-Pacific chhehvela remna, hmasawna leh hausakna thlen chu an tum be a ni a ti bawk.

US a a cham chhung hian Pu Modia hian India mite a kawm dawn bawk a. Company hotulute nen sumdawna chungchangah an inkawm bawk ang. Hei bakah hian United Nations' Summit of the Future ah Pu Modia hi a tel dawn bawk a ni.

<><><>

UNION EF&CC 100 DAYS

Union Ministry of Environment, Forest and Climate Change chuan nungchate chenna ti changtlung tura ni 100 chhunga an hmachhawp an tihlawhtling thei. Tunhnai khan Union Cabinet chuan Wildlife Habitat Development Scheme hi tihchhunzawm relin a tihlawhtlinna turin cheng vaibelchhe sang 2 leh zaruk a dah a. He scheme hian a huam zingah Project Tiger bakah a kalpui Project Elephant leh Development of Wildlife Habitat te a tel a. Sakei tana ram hauhTiger reserve 55, Sai chenna ram hauh Elephant reserve 33 leh ramngaw venhim bik protected area 718 ten he scheme hi an chhawr thei dawn a ni.

<><><>

JAPAN

Japan-a Wajima leh Suzu-a cheng mipui sing 3 chuang chu ruahsur nasa avanga tuilian mai thei anih vangin hmun him lamah sawnchhuah an ni. Thudawn danin khawchin thlirlawktuten ruahpui sur tur avang hian hmun tam takah tui a lian dawn niin an sawilawk a. Hei vang hian Wajima khawpuia mihring 18,000 vel leh Suzu khawpuia mihring 12,000 velte chu Ishikawa Prefecture chhung Honshu thliarkarah sawnchhuah an ni a. Thudawn danin tun tuma ruahsur tur hi a tam ber pawl tur niin lui lian 12 te chuan an kuang an chim pel vek tawh niin Japan Meteorological Agency chuan an sawi a. Hei bakah hian Ishikawa, Yamagata leh Niigata Prefecture ah chuan chirhdiak tam tham tak tawlh thei reng niin an sawi a ni.

<><><>